

SALMOS

Dioskidi kantatiki

Jawen unanmati janchaki

Salmos dasibi jawen kantatidubu janchaki. Kenwankin Israelin enabu besi Salmos kantapaunibukiaki. Salmos yuikin kenwanti jaska shinanibu nun tapintidubuki. Jesús ikunwainbu ichapabun Salmos kantadiakubainmisbuki.

Benima kayabidan, pepabuna bestikiaki, na nawati janchadan

- 1** 1 Juni pepa benimai shinan chankainan,
tsuabunda jamapai chakabuwakin
jatu yusin chakaibu jatun yusian danain inun,
jabun bai chakabu tanama inun,
jabun Dios ichai jaki kaxemisbuwen taea jabube mapuisbumaki.
- 2 Ja juni pepabun Jehová Diosun yusian bechipaikin tapinjaidakin,
jakidi shinankubainmisbuki,
badidi inun meshu medianan.
- 3 Ja yudabudan, jene kexa ji banabu pe ewatan
janu bimiaitian jawen bimi pe jushinmis keskabuki.
Ja inun, jawen pei xanama keskai,
jabun Diosun jancha bechipaimisbudan,
dasibi jaska amis pepajaida ikubainmisbuki.
- 4 Jakia tsuabunda Dios danankin ninkaisbumadan,
jawa pepa jayabumaki.
Jaskawen taea mai kudu niwen sa akin
jatu yamawabainmis keskabuki.
- 5 Jakia Diosun yuda dasibibu janu jatu unanti waitian
jabu Diosunabu pepabu jikiaibu anu jabudi jikimama
jabun chakabuwamiswen taexun jawa manakuti pepa jatu inanma

Diosun jatu kupi bestixanikiki.

- 6 Jakia jawada Diosun bechipaiai yudabu pepakin chibanmisbu
 Jehová Diosun jatu mekekubainaya
 jabun Dios chibainsbuma jani paxati jayama benujaidaxankanikiki.

Dios inun jawen Katuakidikiaki, na nawati janchadan

- 2** 1 ¿Jaskai yudabu Dios ikunwanbuma mae tibi anua jawa unanma
 jawen jawatima bestiwen yubakai shinan betsa betsapa wai
 itimaskakanimenkain?
- 2 Mai anua xanen ibu kushipabu xanen ibu betsabube
 Dios inun jawen Katuaki sinatai jatu maemanun ika
 yubakai jatuki ja ikanikiki.
- 3 Jui kushipawen jabun yuikin:
 “¿Ja Diosun jatun nuku mekea ana en bechipaiamaki!
 ¿Jawen mane dispiwen nuku menexa keska wani pekenankanwen!”
 ikaibun
- 4 jaskaibu Jehová Dios naiudia xanen ibumistun ninkatan
 jatukidi shinain jawa unanbumawen taea jatu usanmiski.
- 5 Janua jau jaki datejaidaxanunbun jatuki sinatajaidakin jatu yuikin:
- 6 “Ja Xanen Ibu en katuni en yunuxanai
 ja medibi mae pepa mati Sión anu xanen ibuxanikiki”,
- 7 Jehová Diosun jaska wani ekidi shinain matu yuinun ninkakanwen:
 “En jawen Katua ea yuikin:
 ‘Min en bakedan, natian en jiwea mia inankin en mia yunuaii.
- 8 Min ea ea akaya mai pakea jidabi anu dasibi jiweabu
 en mia yunukin mina en mia wamaxanaii,
 jatun Xanen Ibu kayabi mia wakinan.
- 9 Mane mestenti tsumaxun
 xanen ibu kushipa dasibibu min jatu yamawaxanaii,
 jaska mai kenti wanikatun jawen kenti chakabuken ibuan pusamis
 keska wakinan’ ”,
- 10 jaska wani matu yuinun ninkakanwen:
 “Man mai anu xanen ibu kushipabuun,
 ina jancha nukun Xanen Ibu kayabikidi ninkakin tapinjaidakanwen!”
- 11 Jehová Dios duawai dayaxunidan,
 jaki mesei datekin benima besti wakubainkanwen.
- 12 Ja inun, jawen bake kenwankin pepawakubainkanwen,
 man ninkamawen taea jawaida matuki sinataya jau bai namakixun
 matu tenanyamanunan.

Jamen tsuabunda Diosun Katua bechipaikin
mekemakubainmisbudan,
jabu besti benimakubainmisbuki.

**Diosun kushipa uinkin yudabun
kenwankubainmisbukiaki, na nawati janchadan**

Davidin kanta kenenikiaki

- 8** ¹ Jehová Dios nukun Xanen Ibu kushipatuun,
ĩmin pepa kushipajaidawen mai jidabi min tsumaken mia
kenwanmisbuki!
Min kushipajaida nai binumai keyatapajaida min iakea jayaki.
- ² Bakebu inun bakeishtajaida chuchu akaibun
mia kenwankin paxati jiwe keska waibu ninkatan
mia jaska waibu bechipaiama jabu miki sinatamisbuwen taexun
ja chakabubu inun ninkaisbuma min kushipajaidawen
min jatu dakewama jadakidi yuitima ixankanikiki.
- ³ Nai dami watan min jaki uxe inun bishi dami wakin janani
uinkin jakidi en shinanmiski.
- ⁴ Januxun junibukidi shinankin:
Nun jawa watidumajaidabiaken
nukukidi jakimama min nukuwen nuimiski.
- ⁵ Yudabu damiwakin dios itsa wabiakin kushipa bexmas wakin
min jawendua wani min jatu kenwanmiski.
- ⁶ Dasibi min dami wani yudabun ibu wakin jatu pe mekei
jau jatun xanen ibu ikubainxanunbun min jatu yununiki,
- ⁷ chaxuwan dasibi inun, ina awa dasibi inun, ni medan yuinaka
jiweabu inun,
- ⁸ peiyabu manaundi nuyabaunmisbu inun,
jene inun ianenwan anu baka nunuabu inun dasibi bakabe
jiweabudan.
- ⁹ Jehová Dios nukun Xanen Ibuun,
ĩmin pepa kushipajaida shinankin mai jidabi anuxun mia
kenwanmisbuki!

Yudabu patapabun Dios danankanikiaki, na nawati janchadan

Davidin kanta kenenikiaki

- 14** ¹ Juni unainsma patapabun Dioskidi shinankin yuikin:
“Dios jayamaki”, imisbuki. Jabudan, padananain atimapai
jiweabuki.
¡Tsua betsan jatunmebi jawa pepa wamis jayamaki!

- 2 Naiudixun Jehová Diosun yudabu uinkin shinankin:
 “¿Tsuabu pepakin ea en Dios ea benabaunkanimenkain?” ibiaya
- 3 jakia tsuan Dios benama dasibibu padananan bestimisbuki.
 Janixun juni pepa bestichai tsuan bechitiduma jayamajaidaki.
- 4 Jabun chakabuwakubainaibudan,
 jawa Dioskidi ninkabumaki.
 Jabiabundi enabu jatu pikin itsa wakanikiki, misi pia keska wakinan.
 Jabun Jehová Dios ikunwanbuman jatu jaska wakanikiki.
- 5 Jabun Dios ninkakin chibainbu Diosun jatu pe mekekubainmiski.
 Jamen jabun jawen jancha chibainsbumadan,
 Dioski datechakayamai saki saki ixankanikiki.
- 6 Jabu nuitapabiakin Dioskidi shinankin chibainbu
 jatuki kaxebiaibun jakia Jehová Diosun jatu pe mekekubainmiski.
- 7 ¡Ja Israelbun mekenikadan,
 Jerusalén anu xanen ibunun ika jau juxanunwen!
 Jehová Diosun nun jawenabu nuku ana pe mekekin duawaya
 Jacobun enabu, ja Israelbudan,
 dasibibu mae tibi anuabu benimai shinan chankanxankanikiki.

**Jiwei pekin Dios kenwanmisbudan, Diosun jatu
 bechipaimiskiaki, na nawati janchadan**

Davidin kanta kenenikiaki

- 15** ¹“Jehová Diosun, ¿miki nukuti jiwe anua tsua jikitan mia kenwantidumen?
 ¿Ja inun, min mati medibi Jerusalén anu tsua mibe ikunkaintidumen?” aka
- 2 Jehová Diosun ea kemakin:
 “Tsuabuda pe besti jiwekin pepas besti akubainmisbu inun,
 chanichakakatsi ikama padananainsma inun,
- 3 tsuki xechakakin jancha chakabu yuisma inun,
 tsuada ja dapi jiweabu chitekin dakewaisma inun,
- 4 tsuanda chakabuwamis duawama danantan
 tsuanda Jehová Dios kenwanmis besti jatu duawakin kenwanmis
 inun,
 tsubuda yubakatan bikabiaken menemisbu inun,
- 5 tsuada pei inantan ana xekakin padainsma inun,
 juni chakabuwamanun, iwanan, juni betsa pei inankin
 yunu chakabu aismadan,
 jaska jiwekunkainmisdan,

jabun besti jawa chakabuwaisma ea kenwantidubuki.
 Jawa ana chakabu meama tsuan ana jatu padankin
 chakabuwamatidumaki”, ea waimaki.

Jiweti pepa Dios anu besti jayakiaki, na nawati janchadan

Davidin kanta kenenikiaki

- 16** ¹ Jehová Diosuun, ea mekekubainwen,
 mia besti kenwankin en mia chibainan.
- ² “Min en Xanen Ibun ea duawakin
 min ea pepa wamiswen taea en benimaii.
 Tsua mia keska jayama min jatu binu keyua kenwankin en mia
 yuimiski.”
- ³ Ja enabu jatidi medibi mia jiwexunkin jabun mia besti
 kenwanmisbudan,
 jatuwen benimai en shinan chankankunkainmiski.
- ⁴ Jakia ja jabun dami betsa dios waxun kenwanmisbudan,
 min jaska tenetiduma tenei yumanjaidaxankanikiki.
 ¡Jamen eanan, jaska wakin jatun dami kenwainbudan,
 yuinaka tesenxun en jatu inainsmajaidaki!
 Ja inun, ja dami betsa betsapa kenwanmisbu jamenken
 jatun kena en yuismajaidadiki.
- ⁵ Jaska en jaya jawa shinanma
 min en Dios mekenan besti en shinankubainaii.
 Ea duawakin en jiwea ea inankin pe besti min ea mekekubainmiski.
- ⁶ Na mai pakea min ea yunukin xanen ibu wani
 jawenduajaidawen taexun en mia kenwaiin.
- ⁷ Jehová Diosuun, min ea mekekin pe yusinmiswen taexun
 duawakin en mia kenwaiin.
 En uxabiaken ea jancha wakin min ea tapinmamiski.
- ⁸ Ean en mia jawa paxkamaken min ebedi nikunkainaya
 tsuanda ea kanemakin ea chakabu amatidumaki.
- ⁹ Jaskawen taexun en juinti ukemedan shinan chankanjaidai en
 benimajaidaii.
- Jawa dateama en mia jiwexunkunkainaii.
- ¹⁰ En mawa ea maiwabu janu min ea jeneama ixanaii.
 Janu mawa bumisbu anu min tsuma chintuinsma
 jadi min ea bashiama ixanaii,
 jau jadia en yumankunkainyamanunan.

- 11 Min jiwekuian kati bai min ea unanmakubainaii.
Mibe nia en benimajaidaya min ea duawakubainaii.

**Dasibi Diosun dami waniwen jawen kushipa nun
uintidukiaki, na nawati janchadan**

Davidin kanta kenenikiaki

- 19** ¹ Jehová Dios kushipatun damiwani nai manaundiabu xabakabi
jawen kushipakidi jabu nukuki chanikanikiki.
Naiudia jabu dami pepa wanibun nuku tapinmamisbuki.
- ² Xaba taxnikidankidankin Diosun kushipakidi chani janchakin
yuikubainmiski.
Meshunan, jabias Diosun kushipakidi chanikin betsa tibi
tapinmadiakubainmiski.
- ³ Jancha kayabi jayama inun jawen jui tsuan ninkamabia
- ⁴ mai jidabi anuxun jaska yudabu tapinmai jawen bana ninkamisbuki.
Xukua tibitun Jehová Dioskidi unanmisbuki.
Nai anu jau jaudi dakaxanun Diosun badi duntani
- ⁵ janua benimai kauankin mai jidabi dunkekubaunmiski,
juni ainyain kai jawen mae anua benimai kainkainmis keskaidan, ja
inun,
juni kushikainkin jatu maemanun ika kushikainmis keskaidan.
- ⁶ Nai uke betsaudia badi taxnikidanadan,
dunkebauni uke betsa mexti iki ibukunmiski.
Jawen chaxa xana bakai danain tsua jani paxatidumaki.
- ⁷ Jehová Dios yusinananidan, kanema pejaidaki,
Jiwea bena inanananmiski.
Jawen yunua betsa waisma ikun kayabiki.
Yudabun jawa unandiana pepabu unanepa jatu wamiski.
- ⁸ Jaska Jehován yusinkin yunumis inun nemamisdan, pepa bestiki,
junibun juinti benimawaidan.
Jawen yunuti jancha jawa chakabumaki,
yudabu jatun beduwen xabakabi jatu uinmaidan.
- ⁹ Jehován jawen datemaidan, xunpin besti ipakeikiki.
Jaska yudabu kenemani jawen jancha tibi dasibi chanima pepaski.
- ¹⁰ Jawen yusianan, chanima pejaidaki,
Oro pepa jawen kadu binuaki.
Ja inun, jawen yusianan, buna bata binujaida keskaki.
- ¹¹ Ja dikabi min yusianwenan, min tsuma ea pewakin min ea
nemamiski.
Mia ninkajaidatan mia axuainbudan, pejaidawen min jatu
manakumiski.

- 12 Tsuan ibubis kanetan ¿dasibi jawen chakabu unantidubumen?
Jehováan, jawa shinanma chakabuwakin en kanemisdan,
ea buaxuntan en shinan ea betsa wawe.
- 13 Min tsuma chakabubia en kenmisdan, ea nemakin ea betsa wawe,
jau jatun ea kenmamistun ea padankin jawenawatan jau ana ea
yunuyamaxanunan.
Min ea jaska wa juni jawa chakabu jayama
ana chakabun ea meama en pepa bestikunkainkatsis ikaii.
- 14 En jancha inun en shinain min jaska bechipaiaiai besti en mia
uinmakin bechipaimakatsis ikaii.
En Jehová Diosuun, min kushipawenan, mishki jiwe keska anu min
ea iduma inun min en mekenan piskumanikaki.

**Jau Diosun medabewanun jawen kushipa
yukanikiaki, na nawati janchadan**

Davidin kanta kenenikiaki

- 20** ¹ Tsuanda bika tenekin Jehová min yukai jau mia ninkanunwen.
Jacobun Jehová Dios ikunkaini jabiatuns jau mia medabewakin
miki sinataibu mia nemaxununwen.
- ² Jawen kenwanti jiwe Sión Jerusalén anuxun
jawen medabenantiwen jau mia medabewanunwen.
- ³ Duawakin min inankuin tibi min inankubainmis inun
inabun xeni menukin min benimawamis
shinain jau matuwen benimakunkainunwen.
- ⁴ Jaska bechipaikin min akatsis ikai jau mia menexunkubainunwen.
Jaska min yubakaidan, jau dasibi Jehován mia amadiakubainunwen.
- ⁵ Nukun Jehován kena kushipawen ma nuku jatu maemamawen
taexun
benimakin jawen unanmati tadi pusteya bandera jawendua
sanán sanan akin nun jakidi shinain besixanaii.
Dasibi min Jehová yukai menekin jau mia axunkubainunwen.
- ⁶ Jehovábe janchakin nun yuka
jawen mae medibi naiudixun jawen kushipa itamamawen
nuku medabewakin nuku binumamis en unaiin, jawa shinan betsa
wamadan.
Jaskaken xanen ibu katunixun jatu maemamamis en ikunwaiin.
- ⁷ Nawa betsabun jatun detenameti tadanbainti ichapa tanamisbuki.
Januxun betsabun jatun caballo ichapa tanadiamisbuki.
Jakia nukubunan, nukun Jehová Dioski chiti ikin ja besti nun
yuimiski.

8 Ja yuda betsabu babutan nidi ikaibun
jakia nukubudan, babuama mestentan nun kakunkainmiski.

9 Jehovahán, nun mia yukakin kenai nuku kemawe,
nukun xanen ibu kushipa inantan nukuki sinataibu maemamakinan.

Bika tenebiakin Jehovah Dios kenwantikiaki, na nawati janchadan

Davidin kanta kenenikiaki

22

¹ En Diosuun, en Diosuun,
¿jaskakin min ea jeneamen?

En bika teneaya eki kematan
¿jaskai juxun min ea paxawamamen?

Bika tenei en kaxaya
¿jaskakin daewakin min ea medabewamamen?

² En Diosuun, badidi inun meshu medan en mia kenabia
min ea ninkatan axuanmawen taea
en jani juindukunti pe jayamaki.

³ Jakia miadan, medibi jawa chakabu min jayamaki.
Min jatu xanen ibuxuna

Israelin enabun mia kenwankubainkanikiki.

⁴ Nukun xenipabu miki chiti ikin
mia ikunwainbu mian min jatu taxnimaniki.

⁵ Jabiabundi min jatu medabewanun mia ea akaibu
min jatu taxnimaniki.

Mia ninkakin chibainbu
jatuki dakeama min jatu medabewaniki.

⁶ Jakia eadan, en juni jawamajaida en xena keska bestiki.
Yudabun ea usainbudan, tsuanda ea uin eki kaxekanikiki.

⁷ Jabun ea uintan ea usain
xechua eki budi budi imisbuki,

⁸ ekidi yuikin: “Ja juninan, Jehovah ikunwankin chibanmiski.
Jau ja juxun medabewayununwen,
ja bechipaijaidaiwen taexunan”, imisbuki.

⁹ Chanima en ewan bake nanti anua ea kainmatan
en ewan chuchu amakin janu min ea juindukunmakubainiki.

¹⁰ En ibu anua en kaಿಂದိာမာတိယာ ea mekekin min taewaniki.
En ibuan pustu medanua min en Dios ini jeneama mia besti min
ipakeaai.

¹¹ Natian jawanda ea bika tenemaitun detekin ea kexeken

tsua betsan ea medabewatidu en jayamaki.
Jaskawen taea chai ea dapaxkabainyamawe.

- 12 Ina awa bene puben keskakin
eki sinataibun ea kenebaunabuki,
mae Basán anua ina awa bene puben kexenameabu keskadan.
- 13 Inu betsa león puben techeden techeden iki
pintsi keskai jaxpabidan eki nidi ikaibu keskabuki,
ea achinun ika eki sinataibudan.
- 14 Bika tenei kushipa jayama en unpax jukua keskaki.
Paxati jayama en xau tseke tsekepa keska en jani katidumaki.
Jawa benimawati jayama en juinti nishma en bin menui tuis tuis
ikai keskaki.
- 15 En jiwea babui en kushipa bexmasi en jaxpa mai kenti tuax keska
tsusianki.
Unpax manui en jana taxkai en jaxakaki tsamiaki.
En ma mawa ea akawakin mai kudu anu min ea putabainaki.
- 16 Juni chakabubun ma ea kexe keyuabuki,
kaman eki xuku dakabidanai keskakinan.
Jabun en meken inun en tae ma ea xui kextuabuki.
- 17 En xau tibi uinkin en tanatiduki.
Eki sinataibun bedi ikama ea uin jeneisbumaki.
- 18 En tadi jabun besti paxkakin jawen jamapai unanti xau mexte
númeroya dabewen maemamanantan bikanikiki.
- 19 Jakia miadan, Jehováan, min en kushipaki.
Ea jenebainama jawaidakidan ea medabewai judiwe.
- 20 Machatu chaipa kenu dabewen en mawayamanun jatu nemawe.
Ja kamanbun jau ea tenanyamanunbun jatu ea nemaxundiawe.
- 21 Ja inun, ja inu betsa león jaxpa keskabun jau ea piyamanunbun ea
nemaxunkin ea paxawawe.
Awa bene puben maxunyan keskabu ea jatu nemaxundiawe.
- 22 Min kushipakidi en betsabu en jatu jancha waxanaii.
Ichabu anuxun duawakin en mia kenwanxanaii.
- 23 Dasibibun man Jehová duawamisbuun, matun juiwen
kenwankanwen.
Dasibi Jacobun enabuun, Jehová pepawakin ewapawakanwen.
Dasibi Israelin enabuun, Jehováki mesekin kenwankanwen.
- 24 Jehóvanan, nuitapaibu jatuki dakekin jatu danainsmaki.
Janua ea akabu jawa juneama jatuki dakei jatuki pechismaki.
Jawada yukabu ninkatan jatu medabewamiski.

- 25 Min nuku putaismawen taexun
minabu ichapabun bedubi en mia kenwain jeneama ikunkainxanaii.
Tsuabunda mia duawamisbu bebunxun
jaska en yubakai en mia menexunkubainxanaii.
- 26 Jabu nuitapabiai keinsbuman pikin yaniwai pepexankanikiki.
Matubun man Jehová benaidan, jaki nukutan man kenwanxanaii,
badi ichapa jiwekunkainkinan.
- 27-28 Jehovádan, ja nukun xanen ibu kayabiki.
Mae pakea tibi jatu xanen ibuxunmiski.
Jaskawen taexun mai jidabi anu jiwebaunabu
yuda betsa betsapa xukuabun
Jehová shinantan ja bebun danti ixun
jau kenwain bexanunbunwen.
- 29 Dasibi xanen ibu kushipabu jatun jamapai midima jaya jawen
jiwekanikiki.
Jakia dasibibu mawai ana mai mishpuxanaibuwen taexun
dasibibun danti ixun jau Jehová besti kenwanxanunbunwen,
jabu ibubis jiwea jayatidubumakidan.
- 30 Enabu pakubainkin Jehováki mesekin kenwanxankanikiki.
Jakidi janchakin yuibaunxankanikiki, pakubainkin jakidi yui
jeneamadan.
- 31 Jabu kaindiabumadi chipu kaintan jawen ichakanikatima inun
jawen dayakidi
jaska akubainmis jatuki chanidiakubainxankanikiki.

En Xanen Ibu Jehová en mekenika pepaki, na nawati janchadan

Davidin kanta kenenikiaki

23

¹ En Xanen Ibu Jehovádan, en mekenanki.

Jatun ea ninkasama jamapai ea inankubainmiski.

² Basi pepa anu ea iyutan ea juindukunmamiski.

Janu unpax pes dakanu iyuxun ea amamiski.

³ En babuai ana ea kushipa wakin ea benimawamiski.

Janu en kanun bai pepawen ea iyukubainmiski,

Jawen kena kushipa duawakin en jatu uinmamiski.

⁴ Jawada bika tenei napanpa meshujaida keska medan en nibiakainaya
min ebe kaiwen taea jawa mesei en dateismaki.

Min en mekenan ebe kakin

min mestenti inun min chaxuwan jawen achikin betanti

tsumabainkin

ea benimawakin min ea shinan chankanwanmiski.

- 5 Eki sinataibu bebunxun piti shadabu min ea pewaxunmiski.
 Xeni ininti pepawen en buxka min ea maxu amiski, ea duawakinan.
 En kenchaki nuxuti pepa matawakin min ea bupakemaxunmiski.
- 6 Min duapa inun min nuikipawen ea putama min ebe
 nikunkainmiski, jatixun en jiweaitianan.
 Janua min en xanen ibuwen taea atimas min jiwe anu mapekea en
 jiwepakexanii.

Xanen ibu kayabi kushipajaida jayakiaki, na nawati janchadan

Davidin kanta kenenikiaki

24 ¹⁻² Jehovánan, jaki janakatsi mestenwankin teawakinan,
 jene ichawakin ianenwandi pewaxun dasibi mai jidabi jaki
 jananiki,
 jau jaska ikunkainun yunukinan.
 Jaskawen taea Jehová Diosdan, mai jidabi jawenaski.
 dasibi jaki jaya inun dasibi jawen jiwebaunabudan.

- 3 Jehován mati anudan, ¿tsua mapeketidumen?
 Ja mati anu jawen tadi jiwe medibi anu Dioski nukuti tsaua anudan,
 ¿tsua jadi ja bebun nitidumen?
- 4 Jabu jikidan, jabun chakabu meisma inun
 jatun shinan pepa besti jaya jikitidubuki.
 Ja inun, jabun dami yushibubu duawakin kenwainsbuma inun
 jamapai tibikidi yubakai jamen chanichakaisbuma jikitidubuki.
- 5 Jabu ma jikiabudan, Jehová Dios jatun mekenantun jatu duawakin
 pewen jatu manakuxanikiki.
- 6 Chanima kayabi jabun Jehová benaibudan, jau
 jaskakubainunbunwen,
 jabun Jacobun Dioski nukukatsis ikin benaibudan.
- 7 Mae nai anu jikiti xui beputi dabe bepenkanwen.
 Bepentan ana bepuyamakanwen,
 jau nukun Xanen Ibu kushipajaida janu jikiyuxanunan.
- 8 Ja Xanen Ibu kushipajaidadan, ¿tsuamen?
 Nukun Xanen Ibu min atiduma detenamenika Jehová Dioski.
 Jehová Dios jawa dateama detenamenika,
 ja nukun Xanen Ibu kushipajaidaki.
- 9 Mae nai anu jikiti xui beputi bepenkanwen.

Bepentan ana bepuyamakanwen,
jau nukun Xanen Ibu kushipajaida janu jikiyuxanunan.

- 10 Ja Xanen Ibu kushipajaidadan, ¿tsuamen?
Jehová Dios kushipajaidatun dasibi binu keyua,
ja nukun Xanen Ibu kushipa chaxakapajaidaki.

Jehovádan, en xaba inun en mekenikaki, na nawati janchadan

Davidin kanta kenenikiaki

- 27** 1 Jehová Dios en xaba keska jatun ea mekemiswen taea
ana jamapai betsaki en dateamaki.
En jiwea Diosun ea kexekubainmiswen taea
ana tsuki en dateamaki.
- 2 Juni chakabubu eki sinatabidan ea achixun yamawanun ika
ibiabidanaibu
jabu juti itan tin iki di imisbuki.
- 3 Detenamenikabu ichatan ea kexebiabaunabun
juinti bene bene iki en jawa jatuwen dateamaki.
Ea detenun itan ekidi detenamenikabu benibiabidanaibun
en xanen ibuki chiti ika babuama en unanuma jiwekunkainaii.
- 4 Jehováan, eska bestikidi en mia yukaii, jaska en bechipaaidan.
Jehováan, badi tibi en jiweawen min jiwe medanxun
min kushipa jawendua shinankin en mia kenwankatsis ikaii.
- 5 Xaba betsatian bika shadabu en teneaya
min jiwe medan ea junekin adutan
min ea mekekubainxanaii.
Janua tsuan ea metidumanu mistutan min ea paxawatiduki.
- 6 Eki sinataibu min kushipawen ma min ea jatu binuma
janua taxnikauan jas shinanma
min jiwe medanxun inankuin mia kua keyuxunkin
mia kenwain benimajaidai kantakin en mia nawaxunxanaii.
- 7 Jehová Diosuun, en mia kenai ea ninkawe.
Ewen dabanán ikin ea kemawe.
- 8 En juintinin mikidi ea yuikin:
“Jehová Dios benai jaki nukuwe”, ea wa
jaskawen taexun miki nukunun, iwanan, min en Dios en mia benaii.
- 9 Miadan, jabia mia besti min en Dios mekenanwen taexun ea
jeneyamawe.
Eki dakei junei iduyamawe.
Ja inun, eki sinatakin ea dananyamawe,

mian besti min ea medabewamiswen taexunan.
 10 En ibubun ea putabiabainabun Jehová Diosuun,
 ea jawa jeneama min ea mekekubainxanaii.

11-12 Jehováan, natian eki sinataibu
 jamen ekidi chanichakai itimaskabidan ea achikatsis ikaibu
 jaska shinainbu keska ea jatu yunuyamawe.
 Jakia min bai pepa ea unanmakin jawen ea iyuwe, en jawen
 kanunan.

13 Ea en jiwekunkainmiswen taexun
 jaska Jehován jawenabu jawen duapa jatu uinmakubainmis
 en jaki nukuxanai en unaiin.

14 Jehová Dioski mestentan jawen kushipai punu nukama
 jawen shinan bechipaikin jawa chintuanma jaki
 mestenkubainkanwen.

Chakabu ana jeneama xabakabi chaninikiaki, na nawati janchadan

Davidin kanta kenenikiaki

32 ¹Tsuanda chakabu Jehován ma bua keyuxuna
 ana chakabu jayamawen taea benimamisbuki.

²Tsuada Jehován jawen chakabuwen taexun ana jawen chiteamawen
 taea
 ja juni ana shinan chakai bika teneamawen taea
 benimakunkainmiski.

³En chakabu xabakabi chaniama en mekeawen taea
 badi tibi tenea en tsekeden ikunkainaiwen taea
 en yuda imanai chushi keskakunkainiki.

⁴Jua badin kua jawen xanawen chushi chapumis keska wakim
 meshu medan inun badidi ea shinanmakin
 en chakabuwen jawen ea timakin e imakin min ea tenemakubainiki.

⁵Jakia jaska tenekubainkin en chakabu ana junekatsi ikama
 shinan pewatan dasibi en chakabu betsa en miki chani keyuniki.
 Jaska ninkatan Jehováan, mianan, min ea bua keyuxuniki.

⁶Jaskawen taexun tsuanda mia ikunwain chintuanma
 bika tenekin mia yukabu min ninkamiski.
 Mia yukakin jaska wamisbuwen taea bika teneti itamama
 jatu anu jubiai ana jatuki kemama ixanikiki.

⁷Miadan, min en mishki kene janu junetiki,

mese juai nemaxunkin min ea mekemisan.
 Jaskawen taea benima paen ea achia ma min ea binumawen taea
 jui kushipawen en kantamiski.

- 8 Xanen ibu Jehován ea yuikin:
 “Mikidi shinankin en mia uiaen ea uinwen.
 En mia tapinmakatsis ikai,
 jancha pewen yusinkin,
 jaska en shinainwen jadata bai pe ja katutan min jawen
 kakunkainunan.
- 9 Ina caballo inun mulon ninkabumawen taexun
 jawen jaxpa anu mane jankishkunkin
 jawen buxkenbainti dispi nexabukuntan
 jawen iyukin ninkamabainkin jawen niti ati jayaki.
 Jaska keska iyamawe.
 Min ea ninkamadan,
 ana jadata yusian betsawen en mia dapixun medabewatidumaki.”
- 10 Juni chakabukubainmisbudan, jawa medabe jayama
 bika betsa betsapa tenekanikiki.
 Jakia tsuanda Jehová ikunwankin chibanbainaibuwen taea
 bika tenebiaya jawen nuikipawen mekekin yabukin akawamiski.
- 11 Man Diosun tsuma matukidi pe janchamisbu pepabuun,
 benimajaidakin Dios kantaxunkin kenwankanwen.

Nukun Jehová Dios pepa ja besti kenwantikiaki, na nawati janchadan

33

- ¹ Man Diosun tsuma pepabuun,
 Jehová benimawai kantaxunkanwen.
 Matun juiwen Jehovákidi kantakin man jawenduawaya
 Jehová Diosun bechipaimiski.
- 2 Jehová Diosun mia axunmis shinankin
 kenjaidawakin arpa mawaxuni kantanenwen.
 Salterio mimawati 10 dispiya mawai kantaxunkanwen.
- 3 Nawati benawen kantai
 mimawati mawa pejaida wai benima chakayamai kantanenwen.
- 4 Chanima Jehován jancha ikun kayabiki.
 Jaska chanichakaisma jawen dami tibiwen nuku uinmakubainikiki.
- 5 Junibun kaneisma inun jatun shinan pepabu jaskawen jiweabudan,
 Jehován jatu bechipaimiski.
 Jehován nuidan, dasibi mai jidabi nati ikaki.
- 6 Jehován jawen jancha bestiwen yunukin nai damiwaniki.

- Jabias jawen janchawendi xun akin badi inun uxe inun bishi damiwaniki.
- 7 Jene ichawakin ianenwan itamama nuajaidawaniki, janus ichawakinan.
- 8 Mai jidabi anu jiwebaunabun Jehová jau duawanunbunwen. Yuda xukuabu tibi jiwebaunabun Jehová kenwankin jau duawanunbunwen.
- 9 Jawen janchawen Diosun yunua dasibi kain dami keyuniki. Damiwakin janakin yunuakeakea ninkatan janu ikibi iki mestenibuki.
- 10 Nawan Dios ikunwanbuma dayakin jaska bechipaikin jatun mae anu daya ewapa taxnimatan jawen jiwebainaibun Jehová Diosun jatu bechipaiama nemakin bextekubainmiski.
- 11 Jakia Diosun jawen daya ewapa jawen jiwekainti jatu taxnimaxunidan, jawa bextekeama mesten ikibi ika ipaxanikiki.
- 12 Jehová Diosun jawena wakatsi jatu katunidan, ja jiweabudan, jabe jiwei benimakubainkanikiki.
- 13 Nai anuxun Diosun juni dasibibu uinbaunikiki.
- 14 Janu Dios jiwea anuxun mai anu dasibi jiweabu tanakubainikiki.
- 15 Jatu jiwea inankin jatun juinti tibi damiwanixun jaska dasibi akubainmisbu jawa jeneama jatu uinkubaunikiki.
- 16 Mai anu xanen ibujaida jawen detenamenikabu midimajaida jayabia jabuwen jiwei paxatidumaki. Detenamenikabu jatun kushipajaida jayabia jawen jiwei paxatidubumadiki.
- 17 Caballowen kushibiabainmisbudan, jawen jiwei tsua paxatidubumajaidaki. Caballo kushipajaidabia jaki chiti ibiamisbu jawen jiwei tsua paxatidumaki.
- 18 Jakia tsuabunda jaki mesei inun jakidi pe janchakin nun yuimis Dios nukuwen nuimis nun ikunwainbu nuku putama nuku mekekubainmiski,
- 19 jatun jiwea benui jau mawayamanunbun inun bunitianbiaken jau debuama jiweyukubainunbunan.
- 20 Nukubun nun Jehová ikunwain nun jaki chiti ikabuki.

Jatun nuku medabewakubainmiski, nuku mekesukinan.

21 Jehován kena medibi kushipa ikunjaidawai nun jaki chiti ikaya nukun juinti benimajaidamiski.

22 Jehová Diosuun, min nuiwenan, min nuku jawa putaismaki.

Jaska min nuikipa mia anua juai besti nun manakubainaii.

**Nukun Jehová Dios duapa jakidi besti
kenwantikiaki, na nawati janchadan**

Davidkidi kanta kenenikiaki

34 1 Badi betsa tukama Jehová kenwankin duawakinan, en jeneama ikunkainaii.

2 En xanen ibu Jehová shinain en keaiin.

Juni keinsbumaan, ebe benimakin ea ninkakanwen.

3 Jehován kena ewapawai jui kushipawen ebetan kenwankanwen.

4 Datekin Jehová en benakin yuka ea ninkakin kemaya ja jawen en dateai ea jenemakin putamaimaki.

5 Tsuabunda Jehová shinainbu benima paen jatu achia jawawen dakeabuma benimaxankanikiki.

6 Nuitapakin en Jehová kena ea ninkakin kemakin en bika teneai dasibi ea putamaniki.

7 Tsuabunda Jehovákidi pe janchakin kenwankubainaibudan, jawen nai tsuman jatu kexe pewaxun jatu piskumamiski.

8 Ibubis Jehováki chiti ikin unankanwen. Jehovádan, medabenan pepajaidaki.

Tsuabunda jaska wai jaki chiti ika ja juni benimakunkainmiski.

9 Jehováki chiti ikin duawai jaki mesei ja keskai pepakubainkanwen. Tsuabuda jaki mesekin duawakin kenwankubainaibudan, jawada pepa akaibu jatu dananma ninkakin inankubainmiski.

10 Tsuada mabuwanyan jiwemisbudan, benui keyuaya nuitapai ana jawa jayama buni tenexankanikiki. Jamen tsuabunda Jehová benakubainmisbudan, jawa jawen jamapai tibi pepa benuama ikunkainxanikiki.

11 Jehová duawatikidi matu yusinun, en bakebuun, nenu bexun ea ninkai bekanwen.

12 ¿Man badi ichapa jiwekatsis ikai?
¿Man benimai jiwekatsis ikai?

13 Man jaskai jiwekatsis ikaidan, matun jancha chakabu nemakubainkanwen, janchakin chanichakakin yuitaskamadan.

- 14 Chakabu betsa betsapa danankin pe besti akubainkanwen.
Jadatuda jawen unanuma kati bai bechitan ja chibankubainkanwen.
- 15 Jehovánan, tsuabunda jawen yusian chibankin duawamisbudan,
jatu mekekubainmiski.
Januxun jabun ea akaibu xabakabi jatu ninkdiamiski.
- 16 Juni chakabubudan, Jehová jatuki sinatajaidakin
mai anuxun jamapai akubainkin ja shinainbu tede akin
ana jakidi shinantima waxanikiki.
- 17 Jakia tsuabunda Jehová duawakubainmisbun jawadawen nuikin
yukaibudan,
jatu ninkakin bika betsa betsapa teneaiibu jatu
nemaxunkubainmiski.
- 18 Jehóvadan, nuku mekei nuku dapi niaki.
Tsuabuda bika betsa betsapa tenei juinti nishmai nui jawawen
jaskatimabiaken
Jehován jatu mekekin paxawaxanikiki.
- 19 Tsuabuda juni pepabu medabenain yudabun jatu unanma
betsa betsapawen jatu ichakawamisbuki.
Jakia Jehován jaska teneaiibu jatu duawakin
jaska tibi jatu putamakin binumamiski.
- 20 Juni pepa Jehován jawen xau tibi mekemiski.
Jaskawen taexun jawen xau betsa tekeama ixankanikiki.
- 21 Jabu juni chakabubu Jehován ibubis jatun chakabuwen
tenanxanikiki.
Jamen tsuabunda juni duapabu danankubainmisbudan,
Diosun jatu unanmakín isin tenemakin kupixanikiki.
- 22 Jakia Jehóvanan, jawen dayadubu jaki chiti imisbudan,
jatun jiwea jatu ichakawama jatu mekekubainxanikiki.

Pepabu Jehováki chiti ikabukiaki, na nawati janchadan

Davidin kanta kenenikiaki

37 1-2 Basi yumei pebiatan jawaida chushimiski.
Ni maxu ewai pebiatan jawaida xanadiamiski.
Jaska keskadiai juni chakabubu jaskaxankanikiki.
Jatuki sinatayamakubainkanwen.
Ja dikabi jawada chakabuwakin kaneaiibu
jatun jamapaiwen kemui nuiyamakubainkanwen.

3 Na mai anu man jiweadan,
Jehová ikunwain jaki chiti ikin

pepa besti aki chintuanma chibankubainwen.

4 Jehová min bechipaaidan, nuikipakin ja besti shinankubainwen.
Min jaska waiwen taexun jaska uke medan pe shinankin min
bikatsis ikai

unankin jawa yaushiana Jehován mia inanxanikiki.

5 Dasibi min jiwea Jehová Dios mekematan
ja besti min ikunjaidawai jaki chiti iken
mia duawakin mia medabewai juxanikiki.

6 Min kaneama inun min pe jiwekunkainaidan,
badi manananbi badi pexea chaxamis keska mia waxanikiki.

7 Jawada Jehová Dios anua min manakaidan,
jin jin ikin jawa yuiama min shinanen besti Dioski chanitan
manakubainwen.

Jatun mia medabewaxanikiki.

Jakia juni betsa chakabu atimapa akatsi yubakamisbudan,
jaskawen jiwekainkin tsuabuda maematidubumaki.

Jaskawen taea jatuki sinatayamakunkainwen.

8 Min sinatamis inun min pubenmisdan, jenekin putakubainwen.

Min sinatawenan, dasibi min jamapai tibi min ana pikukunkainaii.

9 Tsuabuda chakabubudan, matun mai pakea anua Jehován jatu
nichinxanikiki.

Jakia tsuabuda Jehová Dioski chiti imisbudan, ja mai jatu yubani
jabun ibuwaxanikiki.

10 Ana jatixuinda juni chakabubu jayama ixankanikiki.

Jaska jabu chakabumisbu jayamenkain, ixun

jatu benabidanbidani ana jawa jatuki nukukin bechiama
ixankanikiki.

11 Jamen jabu juni keinsbumadan,

jabun mai jidabi ibuwatan jawa bika ana teneama
unanuma benimapakexankanikiki.

12 Juni chakabun juni pepa ichakawanun ika

jaki sinatajaidai xeta yenx yenx amiski,

danan paepa wakin jatu chakabuwakatsis ikinan.

13 Juni chakabu jawen kupiti ma janu ikai unankin

Jhován usanmiski.

14 Tsuabuda chakabubun jatun machatu chaipa kenu bitan kasmai

- jatun pia bitan juni keinsbuma inun nuitapaibu
jabun shinan pewaibu jatu tsakakin tenankatsis imisbuki.
- 15 Jakia ja junibu chakabun jaska shinainbudan,
ibubis jatun machatu kenujaidawen jatun juinti chachitidubuki.
Ja inun, jatun pia teke teke iki yamatiduki.
- 16 Ja juni pepa mabu eskadabesya jiweadan, jaska peki,
jaska juni mabuwanyantun shinain chakabumisbu keskamadan.
Janua juni pepa mabu eskadabes jaya jawa jawen mabu shinanma
ja mabuwanyan binuaki.
- 17 Jabu chakabuibu Jehová Diosun jatu keyukin nishmawaxanikiki.
Jakia jabun Jehová ninkakubainmisbu jatu putama
mekekubainxanikiki.
- 18 Jabun kaneama pepai jiwekubainmisbu Diosun jatu pe mekemiski.
Jaska dayakin pepa akubainmisbu jatu jenexunbaina bitan jawen
jiwepakenunbadikanikiki.
- 19 Badi betsatian betsabun bika tenei buniaibun
tsuabunda Dios duawamisdan,
jawa dakeama inun jatun piti jayakubainxankanikiki.
- 20 Juni chakabubu mawaidan,
basi chushi ketikainai keskaxankanikiki.
Tsuanda Dios danain jaki sinatamisdan,
chi kuin juxumayabaini yamamis keskaxankanikiki.
- 21 Juni chakabun tsuada ea akin jawen jawada bianyutanan,
jawa ana inankin pakanun, iwanan, shinainsmaki.
Jakia juni pepatunan, nuikin jawen jamapai yaushiana ja jaya jatu
inanmiski.
- 22 Tsuabuda Diosun pepawakin duawamisdan,
jabun mai jidabi ibu waxankanikiki.
Jakia jabu Jehová yupuadan, jabu yamai keyuxankanikiki.
- 23 Jehovánan, jaska bechipaii keska jau axununbun
jawen shinan pepa junibu chibanmamiski.
- 24 Pepabiakin kaneaibu Diosun jatu jeneama
ana jatu medabewakin jawen chakabu buatan jatu
mekekubainmiski.
- 25 En bedunantun uini inun natian mestebukin en uinkubainaidan,

- juni pepabu Jehován jenebainai en uinsmaki.
 Janua jatun bakebudi jawa ea iki daketapai mapuaibu en jatu uinsmajaidaki.
- 26 Tsuada jatuwen dabanai ikin jawen jawada yaushiamana xaba tibi jatu inanyumisan,
 jaskawen taexun jawen bakebuwen Diosun duawamiski.
- 27 Chakabu betsa betsapa jenetan pepa besti akubainwen.
 Tsuada jaska jiweaidan, jawen jiwea pepa ma jayaki, janu ipaxanaidan.
- 28 Jehová Diosunan, jamapai pepabu bechipaimiski.
 Jabu jaki chiti ika chintuanbumadan,
 jawa jatu jeneismaki.
 Jamen tsuabuda chakabubudan,
 jatu yamawaken jatun bababudi jayama waxankanikiki.
- 29 Ja inun, juni pepabudan, mai jidabi ibuwatan
 janu jiwepakexankanikiki, niti ikamadan.
- 30 Ja inun, juni pepabu janchaidan, jancha unanepawen imisbuki.
 Ja dikabi yunuti jancha kushipawen padanananma pe besti janchamiski.
- 31 Ja juni janchai jaskamisbudan,
 jawen meketi Diosun yusian jawen juinti medan jaya mapuabuwen taea
 kanei jawa chakabuisbumaki.
- 32 Juni pepa jawada jaya juni chakabun uinkin
 jaki sinatakin detekatsis ikin shinanbiaya
- 33 Jehován jawenabu jatu pe mekeawen taea
 jaska juni chakabubun jatukidi shinan chakabiaibun jatu nemaxunmiski.
 Ja dikabi tsuabunda jatu metukin unanti wabiaibun
 jawa chakabu jabukidi jayama ixankanikiki.
- 34 Tsuanda Diosun yunuti ninkakin man axuin jaki chiti ikadan,
 jatun matu duawakin na mai matu ibu wamaken
 jawa keyuama man janu jiwepakexanaii.
 Janua ja chakabui jiwekubainaibu Diosun jatu kupikin yamawai
 ibubis man uinxanaii.
- 35 Juni chakabu en uinmisan,
 jamapai unan keyuaikidi kenkin jatu benimawabiamis
 ji yumei datan jawendua besti keskabuki.

- 36 Uatian ni pea en uintanima jabianudi ana kawankin en uian ana ja ji jaki nukukin en bechiamaki.
- 37 Juni jakidi chakabu yuikin metuisbumadan, jaskakidi uinkin shinankanwen.
Ja juni pepadan, unanuma jiwenunbadikiki.
- 38 Jakia juni sinatapabudan, jatun jiwea yamai keyuxankanikiki.
Ja juni chakabudan, jatun jiwea ikibi ikadan, keyui yamaxankanikiki.
- 39 Tsuada juni pepabu jabun medabe juidan, Jehová Dios anua jumiski.
Jehovánan, jatu adukin kebeanki, jawada bika teneaiibu mekekinan.
- 40 Tsuabuda pepabun janida idukatsi benaibudan, Jehován jatu medabewakin paxawamiski, chakabubube jusia jiwebiaken jatu kainmabainkinan.

**Jaska shinankin min bechipaiiwen en mia benimawakatsis ikaii,
inikiaki, na nawati janchadan
(Sal 70)**

Davidin kanta kenenikiaki

- 40** ¹En bika teneaidan, Jehován shinan en manamiski.
En kaxayabi yukai Jehová padabeketan ea ninkatan
- ²kini atimapa anua ea piskumakin
ian seuku anu en jikikainai ea nexemiski.
En janu paiai anu daish iki en tin iyamanun
mishkiki paimakin ea mestenwanmiski.
- ³Nukun mekenika Dios kenwain en kantaya
ea ana benimajaidawakin en juiwen kantati bena ea imaimaki.
En jaskai dasibitun ea uinkin ninkai
benimai shinan chankankin ichapabun Dios shinain jaki chiti ikin
ikunwainmabuki.
- ⁴Tsuada ninkaisma jancha binumanikabe niama inun
jabun kenwanti betsa kenwain chanichakaibu anu kaisma
jabu Jehová Dios ikunwain chiti imisbudan,
shinan chankain benimakubainmisbuki.
- ⁵En xanen ibu Jehová Diosuun,
dami betsa betsapa jawendua ichapa min anidan,
nukuwen nuikin duawakin min nuku axunmiski.
¡Tsuana mia binua mia keska betsa jayamaki!

Min pepakidi en chanikauani janchatidubia
jaska waxun en jati jatu yui keyutidumaki.

6 Jau nukun chakabu min nuku buaxunxanun inabu menuti min
manamaki.

Jawada inankuin menuti tibi nun mia axunmis inun
xekeiwan tibi inankuinkin min jiwe anu nun bemis
jaska dabewen mawaida min jawen benimaismaki.
Jamen jaska binumakinan, min jancha ninkakubainkin
jaska min yununi chibankin en mia menexuntidu
min ea xabakabi ninkamakin yusinmiski.

7 Jaskawen taexun mia jancha wakin:

“En nenuki”, en mia waii,
jaska una sebiki ekidi kenenibu keska wakinan.

8 En xanen ibu Diosuun, ean mia benimawakinan,
jaska shinankin min bechipaiiwen en mia axunkatsis ikaii.
¡Min jatu yusinidan, en juinti medan en jaya niaki!

9 Minabu midimabu bebunxun jaska jamapai pewakin min kaneisma
xabakabi en jatu unanmamiski.

Mikidi janchai en jawa pes nismaki.

En jaskamisdan, Jehováan, min unanjaidaii.

10 Jaska min yunuti kushipa kanetima min pe unanmiswen taea en
jawa yuiama ismaki.

Min ea jenekin putaisma inun min mekenan pepa piskumanikakidi
en chanikunkainaii.

Minabu ichapa bebunua janchai jaska min nuikipa inun,
jancha kayabi besti min yuimis

xabakabi jawa juneama en jatu yuipakeaii, jawa jeneamadan.

11 Jehováan, ea bechipaiama ikama ewen nuikunkainwen.

Min nuikipawen inun min shinan kayabi min betsa waismawen
jawa jeneama ea mekekubainwen.

12 Enabun ea jawenchains chakabu betsa betsapa wamisbu
jati tanatan en mia yui keyutidumaki.

Ibubis en chakabu betsa betsapatun ea kebenbauna
jaskatan en ana pe uintidumaki.

En chakabu midimatunan, en bu ichapa binuaki.

Jaskawen taea en benima pae en benua en ana jayamaki.

13 Jehováan, menan ea uinbidan ea putamadiwe.

Jehováan, jawaidakidan ea uintan ea medabewadiwe.

14 Tsuanda en jiwea jabun ea yamawakatsis ikaibu

jau jabuin jatuki kaxeabu jau dakekubainunbunwen.

- Jabun ea ichakawakatsis ikaibu dakeyabi jau paxakubainunbunwen.
 15 Jabu eki kaxeaiibu dakei jau paxadiakubainunbunwen.
 16 Jakia tsuabunda mia benakubainaibudan,
 jatun benima pae jau bikubainunbunwen.
 Min meketi piskuti bitan yuikinan:
 “¡Nukun Jehová Dios kushipa binujaidaki!” iki
 jau mikidi janchai jeneyamakubainunbunwen.
- 17 Jamen en nuitapai bika betsa betsapa tenebiaya
 Jehovahán, ea jakimayamaxanwen.
 Jehovahán, mian besti min ea medabewamiski.
 Jatixuinda ana ea manamama jamapai tibi en tea ea jawaida
 taxnimadiwe.

Jawen mekenika kayabi Dios benakubainikiaki, na nawati janchadan

Corén baken kanta kenenikiaki

- 42** ¹ Ni chaxun unpax manui jene benai kamis keskai
 Jehovah Diosuun, jaska keskadiakin en mia benakubainaii.
- ² Diosun ea jiwea inanmis putakatsi ikama
 unpax manuai keskai en jabe nikunkainaii.
 ¿Jatian ana chintunkidan Dios bebun en nixanai?
- ³ Badidi inun meshu medan kaxai en beun jene jabamisdan, jadan, en
 pitiki.
 En jaskaitianan, badi tibi jawenchains jabun ea bika wakin
 yukamisbuki:
 “¿Janimen, min mekenika Diosdan?” akinan.
- ⁴ Ea jaska tibi yuikin ea shinanmabu ean dasibi en jawen bika teneai
 en juinti en mia bepenxunmiski.
 Min tadi jiwe anu enabu en jatu iyuaya
 jabun ekidi shinankin benimakin jatun juinti jidabiwen
 jaska mia kenwankubaini nun jaskanidan, en shinaii.
 ¡Mikidi besi pepa en jakimamaki!
- ⁵ Dios ikunwain jaki chiti itan
 jawa jeneama Jehovah Dios en mekenan kenwankin en akubainaii.
 Ana punu nukai en jawa bexteketidumaki.
 Jaskawen taea en jamapai tibiwen en ana nuiamaki.
 ¡Jabia bestijaida en Dios inun en mekenikaki!
- ⁶ Ikis en punu nuka shinan chankanmajaidaki.
 Jaska Jene Jordán anu en mibe nikunkaini inun,

Mati Hermón inun Mati Misar anua en jaskakunkaini
jakimama en mikidi shinanjaidaii.

7 Bika betsa betsapa min ea tenemaii.

Manaundia sai iki jawen jui mawa tsakatan taxniai keska
min jancha eki nukuai ninkai en nuitapakunkainaii.

Jenewan shubi kunyan ikai keska mekin en teneaii.

Jene tukax iki buspu tsaubidanai keska
bika betsa betsapa en tenekubainaii.

8 Jaska Dios ewen nuikin ea bechipaii badidi ea uinmaya
meshu medan kantaxunkin jeneama en jiwea mekenika en Dios en
yukakubainaii.

9 Diosun ea mekekin eki sinataibu ea nemaxunmis yuikin:

“¿Jaskakin ana ea shinanma min ea jenebainamen?

Eki sinataibun ea bika tenemaibun

¿jaskai punu nuka en nikunkainai?

¿Min jaskai ekidi jakimamen, ana ea shinanmadan?

10 Jabu eki sinataibun ea ichakajaidawabu

tenei en xau dikabis ea isin tenemakin

hora tibi jabu eki sinataibun jawenchains ea bikawakin

yukamisbuki:

‘¿Janimen, min mekenika Diosdan?’ ” akinan.

11 Dios ikunwain jaki chiti itan

jawa jeneama Jehová Dios en mekenan en kenwankubainaii.

Ana punu nukatan en jawa bexteketidumaki.

Jaskai en jamapai tibiwen en ana nuiamaki.

¡Ja bestijaida en Dios inun en mekenikaki!

Chanima kayabi Dios medabenan yukanikiaki, na nawati janchadan

43

¹ En xanen ibu Diosuun, min yunuti kushipawen ea unantijaida
wawe.

Ma min ea unan en minaken ja jabun mia ikunwanbuma ea
nemaxunkin ea medabewawe.

¡Juni chakabu chanichakaibu anua ea paxawadiwe!

2 Min en Diosun ea kebenkin ea mekebia

¿jaskakin ea danankin putatan min chai niamen?

Jabu eki sinataibun ea ichakawakin bika tenemaibun

¿jaskai nuitapai en punu nuka nikunkainai?

3 Min mati medibi min janu yubakani jadi min jiwea anudi ea iyukin
min bai xabakabi chaxa wakin min chanima janchawen ea
uinmawe,

- jau jatun min bai ea yusinkin tapinmanunan.
 4 Jehová Diosun, min ea yunua kai januxun mia kenwanmisbu anu en jikixanaii.
 Jadixun arpa mawaibun benimakin en mia kenwanxanaii.
 En Diosun, mian besti en jiwea benimawakin min ea shinan chankanwanmiski.
- 5 Dios ikunwain jaki chiti itan
 jawa jeneama Jehová Dios en mekenan en kenwankubainaii.
 Ana punu nukatan en jawa bexteketidumaki.
 Jaskai en jamapai tibiwen en ana nuiamaki.
 ¡Ja bestijaida en Dios inun en mekenikaki!

Jehová Diosdan, nukubekiaki, na nawati janchadan

Corén baken kanta kenenikiaki

- 46** 1 Jawada bikajaida nun teneai nukun Diosun nuku medabewamiski.
 Nuku kexekin nuku adua tsuan nuku metiduma
 Dios nukun kushipajaidaki.
- 2 Pacha sakukin mai chudunwankin
 ja mati tibi tsekebain ianenwan nuajaida medan pukui keyubiaya
 nun jawen taea nun jawa dateama ixanaii.
- 3 Ianenwan shubi buspu tsaubidani jawen jui kain meseai ninkabiai
 nun jawa dateama ixanaii.
 Mai mati matipa sinatai pacha sakui saki saki iki mesejaidabiaya
 nun jawa dateama ixanaii.
- 4 Jene ewapa texexa dabedan, jabudan, Diosun mae jawen
 benimakanikiki.
 Dios dasibi binuatun mae medibi chakabumajaida jawen benimaikiki.
- 5 Ja mae medan Dios jiwexun jatu tsuma keyuaki.
 Xaba betsa taxniai tibi Diosun medabewakubainikiki.
- 6 Diosun jawen jancha nawa tibi jatu ninkamaitian
 datei saki saki iki jatun jui denke ixankanikiki.
 Mai yamakainaya xanen ibu tibitun jatun kushipa benuxankanikiki.
- 7 Ja nukun Jehová Dios dasibi kushipa binu keyua na jabia nukubeki.
 ¡Jacobun Diosunan, nuku kexekin nuku adua tsuan nuku metidumaki!
- 8 Jehován jawen kushipawen na mai anuxun nawabu jatu
 dateakeakeimadan,

nedi bexun uin bekanwen.

- 9 Mai kesuakea anua jatube detenamekin
jatun pia tekekin jatun jashi teke keyukin
januxun jatun detenameti caballo tadanmabainti
ana tsuabe detenametidubuma wakın jawen jenekin chiwen jatu
menun keyuimaki.
- 10 “¡Ea kenwankin ea unanti wakanwen!”
¡Eadan, en Jehová Dioski!
¡Jiwebaunabu mamaki en ea jiweaki!
¡Mai jidabi mamaki en niaki!
- 11 Ja nukun Jehová Dios dasibi kushipa binu keyua na jabia nukubeki.
¡Jacobun Diosunan, nuku kexekin nuku adua tsuan nuku
metidumaki!

Dios nuikipa yukatikiaki, na nawati janchadan

Davidin kanta kenenikiaki.

- 51** ¹ Jehová Diosuun, min nui paewen ewen dabanán iwe.
Min ewen nuimiswen taexun en chakabu ea tede axunwen.
- ² ¡Ibubis en chakabumis ea chukaxunwen!
¡Ean en kanemis ea tede axunwen!
- ³ Min yusian kanei en patapamis chanima ibubis en ma unaiin.
Jaskatan en shinan uke medan en chakabu ibubis en tede atidumaki.
- ⁴ Jawada chakabu min nemani ja meai min kupiti wani
ean ja mei mikidi besti en chakabumiski.
Jaskawen taea kupikin min unanti wamisdan, min kaneismajaidaki.
Min kupiti tsuan binutidumajaidaki.
- ⁵ Chanima en kain bena en chakabu iki taeniki.
En chakabudan, en kaindiana en ibu anua en jayaniki.
- ⁶ Chanima juinti pepa kayatapia jayabu min jatu bechipaiaii.
Min unanepa uke medanua min ea inanmiski, xabakabi ea
tapinmakinan.
- ⁷ En chakabu min ea chuka en ana chakabu jayama ixanaii.
En chakabu ea chukakin min ea xunpin wanan,
ja matsi tanki juxupamis en binuxanaii, jawa ana chakabu
jayamaidan.
- ⁸ En xau min ea teke teke abiaima
ana benima bena ea inankin
ea shinan chankanwankubainwen.
- ⁹ En chakabu atimapa tibi mia bebun taxnia min uiainan,
ea tede axuntan ana jaska shinankin uinyamawe.

- 10 En Diosuun, ana en juinti bena xunpin ea wakin en yushin bena wakin ana ea chintuntimawawe.
- 11 En mibe nia ea paxkayamawe.
Min Yushin Pepa ea medanua ea mebinyamawe.
- 12 En benubiaya min ea medabewakin piskumani keska ana shinan bena inankin ea shinan chankanwanwen.
Min yushin ichakanikamawen ea tsumawe, en jaskadiakunkainunan.
- 13 Min ea jaska waya ja min ea yusiainwen mia ninkaisbuma juni chakabubu
jau mia anu benunbun min bai pepakidi en jatu yusinxanaii.
- 14 En Diosuun, en Diosuun, en chakabu min ea piskumamiski.
Juni betsa en june tenainmadan, jaska keska en ana ayamanun ea nemawe.
Min jaska nemakubainkin jawa kaneismawen taea min pepakidi kantai en chanikunkainxanaii.
- 15 Jehová Diosuun, en jui ea bepenwen.
Min ea jaska waya kantakin en mia kenwankubainxanaii.
- 16 En inankuin tibi inun inabu tibi en mia menu keyuxunkin en mia jawen benimawakatsi ikin en mia inanbia min bechipaiaibiaken en mia jaska waxunkatsi ikamaki.
- 17 Ja inankuinti tibi min bechipaiaidan,
en yushin min ea mexteima en bika tenebiai
jas shinanma en juinti betsa watan chakabu min ma ea pewaima ea uinkin min ea bechipaiaii.
- 18 Min shinan pepawen Sión medabewakin pewawe,
ana jawen kenekauana benibaunkin jau Jerusalén ana kene bena wanunbunan.
- 19 Januxun inankuin tibi inun inabu menu tibi jaska min bechipaiai mia axuainbu jawen benimawakin min bikubainxanaii.
Mia kenwanti chi tapu anuxun ina awa bakebu mia menuxunxankanikiki, mia benimawakinan.

Dioswen yudabu benimamisbukiaki, na nawati janchadan

Davidin kanta kenenikiaki.

63 ¹En Diosuun, min en Dioski!
Mia unpax manuai keska wakin
miki nukunun ika en mia bena chakayamaii.
Ja mai metu unpax jayama anua nia keskaxun
unpax manuchakayamai keskakin en jiwea jidabiwen mia
bechipaikin

- en mia benakubainaii.
- 2 Min tadi jiwe medibi medanua en mia uinkatsis ikaii,
min kushipa inun min jawendua uin shinan chankainan.
- 3 Min nuikipadan, min nuku jiwea inani keskama binuaki.
Jaskawen taexun en juiwen en mia kenwankubainaii.
- 4 Jiweyukunkainkin en mia duawakubainaii.
Mikidi en meken meshan en mibe janchakunkainaii.
- 5 Piti ichapa jawendua watan pi benimai shinan chankain
pepemisbu keskakin en juiwen benimakin en mia kenwankubainaii.
- 6 Meshu medan inatan uxakin mia shinankubaini en uxamiski.
- 7 Min en medabenantun ea medabewa benimai min punyanwen min
ea yabukin akawa en shinan chankanmiski.
- 8 En jiwea jidabidan, en miki dasiaki.
Min ea jaska wawen taexun min meken yusiudiawen ea tsuma
mestenantun min ea putaismaki.
- 9 Tsuabunda ea detekatsis ikin benaibudan, jabu mawa
jatu maiwabudan, jatun kupitidan, mai uke medanjaida bumisbuki.
- 10 Machatu kenu chaipawen jatu tenanbu
kaman inawan pikin jatu yamawakubainmiski.
- 11 En xanen ibujaidadan, en Dios shinain en benimakunkainmiski.
Tsuabunda Diosun kena datan aki
jakidi kantakin kenwankubainmisbuki.
Jakia tsuabuda janchai chanichakaibudan,
jatun kexa Diosun jatu bepumiski.

**Diosun duapa pepawenan, kenwain
benimakunkaintikiaki, na nawati janchadan**

Davidin kanta kenenikiaki.

- 65** ¹Dios mae Si6n mekeatuun,
min pepajaidawen taexun mia kenwanmisbuki.
Jaska uinkin min bechipaiiai mia yubatan
menenun, iwanan, mia axunkubainmisbuki.
- 2 Mai jidabi anu jiwebaunabun mibe janchanun ika bekanikiki.
Mibe janchakin mia yukaibu jatun janचा ninkakubainwen.
- 3 Nukun chakabu tibitun nuku tsumaxun bika tenemabiaya
mian ja chakabu bechipaiama nuku buaxunkin min ana
shinainsmaki.
- 4 Jadatuda yuda min jiwe medibi anu mia dapi jiwemakin
katuxun min iyua benimakunkainmiski.
Betsa betsapa pejaidawen min jatu duawadan,

min jiwe medibi anua nun pe jiwekatsis ikaii.

- 5 Min nukun mekenika Diosunan,
pepa yunukin chakabu nemanixun jawen min kushipajaida nuku
uinmakin
e imakin min nuku xabakabi jawen manakukubainaii.
Mai jidabi kesukauana anu inun ianenwan anu chajjaida jiweabun
mia ikunwain miki chiti ikabuki.
- 6 Min kushipa paewen mati matipa
min jatu tsuma pewakin mestenwanmiski.
- 7 Ianenwan bechuduni buspu tsaubidan
kunyaan ikai nesewakin min pes wamiski.
Yudabu jatun mae anua itimaskaibu
nemakin min jatu pes wadimiski.
- 8 Badi juaikidia inun badi kaikidi chajjaida ja maiwen jiwebaunabu
min e imati kushipajaida uin saki saki imisbuki.
Miwen benimai jiwebaunabu sai sai idiamisbuki.
- 9 Mian besti mai jidabi mekexun ui imakin dasibi min benemamiski.
Mian jene bai tapia tibi chada chada imakin nashimakin
xekiwan trigo min benemamiski.
Jaska wakin yunu bai wabu tibi min jatu pewaxunmiski.
- 10 Mian mai pewakin uiwen min babuwa dayakin
tsispubainkin ukebukun manchinbainabu
namakis ja bai tapianwen jau kanun ui ichapa min jabamamiski.
Jaska wakin mibanbu min jatu duawaxunmiski, yunu ichapa jatu
inankinan.
- 11 Min nai kuin ichapawen jatu duawakin
jawa yaushiamina min inanshinawen taea
ja yunu tsekati baditian biaibu midima min jatu duawamiski.
- 12 Janu tsua jiweabumanu basi benemakin duawakin min nanke datanmiski.
Ja mati tenanman yuinakapan mewe piti jayawakin
min beyusti tadi sawema keska wamiski.
- 13 Panpa anu ma basin keyubia anu janu chaxuwanen pi ichamisbuki.
Napaku anu xekiwan tibi benei bachi pepa sawemisbu keskaki.
Jaskawen taea dasibibu kantai benimai sai sai imisbuki.

**Dasibi mai jidabi anu jiwebaunabun jau Dios
kenwanunbunwen, na nawati janchadan**

- 67** ¹Diosun, nukuwen nuikin nuku pepawawe.
Min uin pewaiwen nuku duawakubainwen,
²jau mai jidabi anu jiwebaunabun jaska shinankin min bechipaiai
inun

min mekenan ewapa jau mia unan keyununbunan.

3 Diosuun, mae tibi anuxun jau mia kenwanunbunwen.
¡Mai jidabi anuxundi jau mia kenwandiabaununbunwen!

4 Mai jidabi nawa xukuabu tibi anu jatu xanen ibuxunkin
jawen unanti wati kushipa pepawen min jatu mekekubainmiski.
Jatu jaska wakin mai jidabi anu min jatu pe yunukubainaii.
¡Jaskawen taea jau mai jidabi anuabu mikidi sai sai iki
jau benima chakayamakubainunbunwen!

5 Diosuun, mae tibi anuxun jau mia kenwanunbunwen.
¡Mai jidabi anuxundi jau mia kenwandiabaununbunwen!

6 Mai anu nun miban nuku bimixunmiski.
Nukun Diosun nuku piti inankin nuku duawamiski.

7 ¡Diosun jau nuku duawakubainunwen!
¡Mai jidabi anu jiwebaunabun jau pepawakin ja besti duawakin ken
wankubainunbunwen!

Bika betsa betsapa Davidin tenejaidanikiaki, na nawati janchadan

Davidin kanta kenenikiaki

69 ¹ En Diosuun, jene anu kai en ma jasa kemaki.
Ea mekekin nexediwe.

² Ian seuku nua medan en ma jikikainaii.
Jawa kushipaki en paitidumaki.

Ma jene nuajaida medan en pesa ja jene kushibidankin
ea bukin ea taxpi taxpi abainikiki.

³ Ea jaska waiwen taea en bis ichakayamai en jui menui tedis ika
en texu xui en isiaiin.

Jaska nixun en Dios manajaidai en bedu chadishxun
uinbiai en ma babuaii.

⁴ Eska tibiwen taedan, en jawa jatu chakabuamabia
jamen ea danankin en bu ichapa binumai eki sinatakanikiki.

Tsuabuda eki sinataibu ana ichapajaida jayaki.

En jatu jawa wamajaidabia ea yamawakatsis ikanikiki.

Jatun jamapai en jatu yumetsuinsmabia

jamenmens ea yunuchakakin: “Ea ana inanwen”, amisbuki.

⁵ En Diosuun, jaskatimabiaken ibubis en patapaima min unaiin.

En jaskaima jani en chakabu min uinyamanun en junetidumaki.

⁶ Jehová Dios kushipa binuatuun, tsuabunda mia ikunwanmisbudan,

- en kanei chakabuimawen taea jekidi shinain jau ewen
dakeyamanunbunwen!
Israelin mekenika Diosuun, jabun mia chibankatsis ikin mia
benaibudan,
jiau en chakabuima shinain jau jabu bextekeyamanunbunwen!
- 7 Ea chite paepawabu besu xanabidi ikin
dake paepakin miwen taexun en tenekubainaii.
- 8 Eadan, tsuan ea unanbuma nawa betsa keska wakín
en betsa kayabibun ea danankanikiki.
- 9 Janu miki nukuti jiwe bechipaikin en shinan chakayamaii.
Ja inun, tsuabuda mikidi jancha chakabukin ja ikin mia chiteaibu
ean en mia tenexunkubainaii.
- 10 Janu en kaxaitian inun janu en samakeaitian jabu eki kaxemisbuki.
- 11 Jaya kaxati tadi sawea en nikaunai dasibibun ea uinkin ea usan
keyumisbuki.
- 12 Nukun maewan beputi kexa icha mania tsaubauna ea chitei
janchamisbuki.
Ja inun, jabu paentan ekidi kaxei kantamisbuki.
- 13 Jakia Jehováan, en mia ea akaii.
En Diosuun, jna jabiatian ea medabewawe!
jMin nuijaidawen ea kemawe!
jMin ea putama ea medabewakubainmiswen taexun ea
piskumadiwe!
- 14 jIan seuku anu en jikikainyamanun ea jeneyamawe!
jJabun ea danainbu anua inun jene nuajaida medanua ea mekekin
ea nexediwe!
- 15 jJene kushibidankin jau ea taxpibainyamanun ea nemaxunwen!
jJene shubi buspu tsaubidankin jau uke medan
ea jasakin ea bepubainyamanun ea nemaxunwen!
- 16 Jehová Diosuun, miadan, min pepa inun min dasibi nuikipaki.
jMin duapajaidawen ewen nuikin ea shinankin menan ea kemadiwe!
- 17 jNa en min tsuma kayabidan, ea dananyamawe!
Natian en ana pemajaidaki. jMenan jawaida ea kemadiwe!
- 18 jEki sinataibu ea putamai ea dapi juxun ea paxawadiwe!
- 19 Jaska ibubis en mikidi chakabuima en jawen dakeai inun
yudabun ana ea bechipaiama en bika teneaidan, min unanjaidaii.
Ja dikabi jatida eki sinataibu min unandiaii.
- 20 En chakabukidi tsuanda ea yuikin ea juinti metexmiski.
Ea jaska wabu benima jayama en punu nukajaidaki.

Ewen nuikin tsuan ea daewakin benimawatidubu jamen en
benakubainaii.

- 21 Ea danankin en pitiki ea daunun ixun dau kapainmabuki.
En unpax manui en tetsusinaya vino chakabu bunkash ea
amaimabuki.
- 22 Beyuskin jatun piti pepa jatun tapuki ichawakinan,
jaibunanbiakin janubi bidun keska watan jawen taea jau bika
tenenunbunwen.
- 23 ;Jatu bexux wakin uinmamatan
jatun kishi babu wakin jatu saki saki imakubainwen!
- 24 Min sinata pae jatukidi taxnimakin jatu uinmawe.
;Min jatuki sinatajaidai kunyan ikai kainkainkin jau jatu achi
keyununwen!
- 25 Janu jiwebianibu anu jau ana tsua jiweyamanunbunwen.
Janu bua jatun tadi jiwe medan jau ana tsua
jiwetaskayamanunbunwen.
- 26 Mian tsuada min jatu bika tenema kai ja juni chakabun ana jatu
chibanbainkin bika jatu tenemamisbuki.
Mian tsuada min isin tenema kai ja isin betsa teneaiiki jabu jaki
kaxemisbuki.
- 27 Chakabuauibu jabias jatun chakabuwen jabiaskadi wakin jatu
manakukubainwen,
min nuiwen jatun chakabu jatu buaxunamadan.
- 28 ;Jabu jiweabu jatun kena min jatu kenemis ja una medanua tede
awe!
;Juni pepabu min jatu tanakin kenemis anu ja juni chakabun kena
kenekin netanyamawe!
- 29 Jakia eadan, isin tenei en bika teneaii.
En Diosun, menan ea benitan ea piskumadiwe.
- 30 Kantakin Diosun kena kushipa en kenwaiin.
Jawada pepa uinkin Dios en kenwankubainaii.
- 31 En Dios jaska waya ewen benimawaxanikiki,
en ina awa bene ewapa kasmai
ina awa bene jatiuma jawen maxun inun jawen taeyabi
en menu keyuxuntidu binumakinan.
- 32 Jaska wakin Dios en uinmaiwen taexun ja bika teneaiibu
benimaxankanikiki.
Tsuanda Dios benakubainaibu jatun juinti medan ana shinan
chankanxankanikiki.
- 33 Tsuada nuitapaibu Diosun jatu ninkamiski.

Ja inun, jawenabu ichakawakin bichiti jiwe medan jatu bichinbiabu
jawa jatu danainsmaki.

- 34 Dasibi nai inun, mai inun, ianenwan inun,
dasibi jabu tibi anu dami wakin Diosun jiwemani jiwebaunabun
jabun jau kenwankubainunbunwen.
- 35-36 Diosun ja maewan Sión ana meketan
Judán mai pakea anu jatun maewan tibi ana jatu benawamakin
benimaxanikiki.
Diosun tsumapan bakebun ja maewan ibu watan ja medan jiwekin
jatuna wanunbadikanikiki.
Jabun Diosun kena bechipaimisbu ja medan jiwepakexankanikiki.

Diosun bakebun kati bai pepakiaki, na nawati janchadan

Asafin kanta kenenikiaki.

- 73** ¹ Israelbun Dios pepajaidaki,
jabu juinti jawa chakabuuma jatu medabewamisan.
- ² Jamen eadan, unudi ana jatun chakabuki en kematananan,
en benukeanshinaki,
en shinan atimapan ea achia daxkibaini tin ikeanidan.
- ³ Jabun chakabuwaibu inun jabu keainbu jatun jamapai
ewawabainaibu
jatu uin ea en jaskatiduma shinain en jatuwen kemuimaki.
- ⁴ Jabudan, jatun yuda jawa isin teneama
jatun mawawen jawa nuiabumaki.
- ⁵ Yudabun jamapai bika tenemisbu keska jabun meabumaki.
Betsabu jatun jiwea bika tenei jin jin ikaibun
jabun chakabuwaibun jaska shinainsbumaki.
- ⁶ Jaskawen taea jabu keinan, mane teuabu keskabuki.
Jatu detei itimaskaibudan, jatun tadi sawea keskabuki.
- ⁷ Jatun yuda xuadanwain jatun bedu dikabi chudumisbuki.
Jatun shinan chakabu ewa wakin mata wakubainkanikiki.
- ⁸ Kaxetan usananain inun keinan,
yuda betsaki kaxekenainan, jawen taea jau chakabu betsa
betsapanunbun
chachinamekin jatu bedumisbuki.
- ⁹ Dioskidi jancha chakabujaidakin
mai jidabi anu jatun jancha jaska pawabaunmisbuki.
- ¹⁰ Jaskawen taexun yudabun jatu kenwanmisbuki,
jaska jiwemisbu pe keska tsuan jatun chakabu bechiamadan.

- 11 Jabu yuka ikin: “Jaskadan, ¿Diosunan, unan keyuimenkain?
Ja Dios binu keyuatun jaskadan, ¿tana keyukin unanxanimenkain?”
- 12 ¡Ja juni chakabubu jatu uinkanwen!
Jabu unanuma jiwekainkin jatun mabu tibi ewawabainkanikiki.
- 13 En juinti jawa chakabumabia ea jawa medabewamaki.
Chakabu betsa betsapa mekin en juinti inun en meken
detsismabiaken
- 14 jaskakin badi tibi jawenchains ea kusha kusha akabu en
yumankunkainaii.
Penama tibi ea ichakawakin ea bika tenemakanikiki.
- 15 Ean jaska shinainbu keska en shinanshinadan,
min bakebu bai betsa jatu yusinkin padankin
en jatu benukeanshinaki.
- 16 Ja chakabubu jaskabainaibu ean ninkakin tapinun ixun en shinanan,
enadan, bikajaida ikimaki.
- 17 Atimas Dioski nukuti tadi jiwe anu jikitan
jaskaibu shinain jadixun en tapinshinaki,
jatixun besti niti ixanaibudan.
- 18 Diosuun, jabu janu butidubudan,
jatun bai mayun keska anuxun min jatu xutua
nishmabainxankanikiki.
- 19 Jawa manama jawaida min jatu yamawaxanaii.
Jabu date betsa betsapaya dasibi keyuxankanikiki.
- 20 Jehová Diosuun, tsuada uxabia namayabi bestenkidanmis keska
mia benikidan ja padanananmisbu jatun besu uinkatsi ikama
jatuki sinatajaidakin min jatu dananxanaii.
- 21 Uatian sinatajaidai
jaskai en juinti en isinjaidaimaki.
- 22 Ean en jawa unanmajaidawen taea en jadakidi shinan pewatiduma
ikimaki.
Min mian ea uianan, en yuinaka keska ikimaki.
- 23 Jabiaskabiaken ean en mia jeneama ikunkainaii.
En meken yusiudi min ea tsumamiski.
- 24 Min yusian pepawen min ea tapinmakubainmiski.
Chipu min kushipawen nai anu ea benimawakin min ea ixanaii.
- 25 ¿Nai anudan, en tsua jayamen?
Mia besti en jayaki.
Na mai ana bechipaiama mibe besti en jiwekatsis ikaii.
- 26 En jiwea dasibi yamaxonikiki.
Jakia min en Diosunan,

jawada min ekidi yubakai tanani ikibi ika
 jaya jatun en juinti ea mestenwan en shinan
 chankankunkainaii.

- 27 Tsuabunda mia jenebain mawai benuxankanikiki.
 Tsuabunda mawaida mia chiban pewaisbuma yamaxankanikiki.
 28 Jakia eadan, Dios anu en kemaii.
 En jakidi jaskakainaidan, jadan, peki.
 Min en xanen ibu Jehová Diosuun, min ea mekekin adumiski.
 Min dasibi ea jaska waxunmis mikidi en chanikaunkatsis ikaii.

Diosun tadi jiwe medan jikia pejaidakiaki, na nawati janchadan

Corén bakebun kanta kenenibukiaki.

- 84** ¹ ¡Jehová kushipajaida dasibi binuatuun,
 min tadi jiwedan, jabi jawendua benibin!
² Min tadi jiwe jemaintin kenekauana medan janu jikia
 jaska mia bechipaijaidai en jadi janus ikatsis ikaii.
 Benima chakayamai en juinti jidabiwen min Dios jiwea kantakin en
 kenwanmiski.
- ³ Jehová kushipajaida dasibi binutuun,
 min en xanen ibujaida inun min en Dioski.
 Ja chunu inun basi isa mishtin jabun janu jatun bachi paketan
 tushai bakeyakatsi
 ja chi tapu dapi jatun na wamisbuki.
- ⁴ Tsuabuda min tadi jiwe medan jiweidan, benimamisbuki,
 jadixun mia kenwain jawa jeneamadan.
⁵ Tsuabunda mia anua medabe bi benimamisbuki.
 Jabun min mati bechipai janu mapekenun ika bichi tae sawea
 bukubainmisbuki.
- ⁶ Ja napaku janu kaxanibu anu jabu buidan,
 jabiaskadi tenekin mebiakin chacha pepa waxankanikiki.
 Janua ja ui ikin jatu duawakin medabewakin matawaxanikiki.
⁷ Jatun kushipa Dios anua bi ewakubainkin
 ja maewan Sión Jerusalén anu uinkin Dios kushipa binua
 uinxankanikiki.
- ⁸ Jehová Dios kushipajaida dasibi binuatuun,
 Jacobun Diosuun, ¡en mibe janchakin mia yukai ea ninkadiwe!
⁹ Diosuun, nukun xanen ibujaida wakin min katuni,
 nukun mekenikadan, min pepawen duawakubainwen.

- 10 Min jiwe jemaintin kenekauana medan xaba betsatian en jikia pejaidaki.
1,000 xaba nun janida jamen nimis binuaki.
En Diosun jiwe jawen beputi kexa nixun en jatu bepunxunkubainaidan,
chakabu anu jiweabu en jatube dasia binuaki.
- 11 Jehová Diosun jawen bin nuku pexaxunkin jawen nuku mekekubainmiski.
Tsuabuda jawa chakabuuma jiweabu
Jehován jatu bechipaikin jatu duawakubainmiski,
jawa jawen pepa yaushiamadan.
- 12 Jehová Dios kushipa dasibi binu keyuatuun,
tsuada miki chiti ikin mia ikunwainan, benimakanikiki.

Diosun nuku mekekin idumamiskiaki, na nawati janchadan

- 91** ¹Tsuada Dios dasibi kushipa binuatun
jatu meke pewaxun utawa pe jiwemisbun
- ²jabun Dios yuikin:
“Mianan, min ea idumamiski.
Min en jiwe ewapa kushipaki.
Min en Dios pepaki chiti ikin en mia ikunwaiin.”
- ³Diosun besti bidun junea tibi inun isin atimapa tibi nuku mekekin nemaxunmiski.
- ⁴Takadan jawen bake mekekin nuxamis keska wakín min nuku mekekin nuxa nun dateismaki.
Shinan betsa wama nuku putama
min nuku mekekubainmiski,
jawen pia nemati keskawenan.
- ⁵Meshu medan kai jawada meseki dateyamakanwen.
Badidi matukidi pia bishku bishku abiaibun dateyamakanwen.
- ⁶Meshu medan isin atimapa
matuki jikitiduki dateyamakanwen.
Badidi isin betsa tibi matuki jikitan
yamawatiduki dateyamakanwen.
- ⁷Mia dapike min yusmaudia
1,000 mawai di itidubuki.
Ja inun, min yusiudia
10,000 jabiaskadiai di idiatibubuki.
Jakia miadan, min jawa isin betsa teneama pe jiwekunkainxanaai.
- ⁸Jaska ja juni chakabubun

jaska bechipaimis jatun kupiti mei ikaibu
chanima ibubis min jatu uinxanaii.

- 9 Jehová Dios kushipa dasibi binuatun
jau mia kexebaunun inun
jau mia mekekubainun
min ma jaibuwawen taea
- 10 jawa chakabu mia anu beama inun
jawa isin betsa tibi min jiwe anu jikiama ixanikiki.
- 11 Diosun jawen nai tsumabu mia anu yunuxanikiki,
jabuan janida min kai jau mia mekekubainunbunan.
- 12 Maxax anu min nia min jawa juti iymanun
jawen nai tsumabun mia mekekubainxankanikiki.
- 13 Inu betsa león anu inun, yuinaka mese atimapa anu inun,
dunu piananbu anu min nibiakauanai mia jabun meama
ixankanikiki.
- 14 Diosun yuikin:
“Jau juni chakabubun meyamanunbun
ja en tsuma pepatun ea bechipaikin ea unainwen taexun
ean ja mekekin en paxawaxanaii.
- 15 Jatun ea kenaya en kemaxanaii.
Ea kayabis en jebes ixanaii.
Jawada bika teneai binumatan
bechipaijaidakin duawakin yudabu en kenwanmaxanaii.
- 16 Jau jawen taea benimawakunkainun jawen jiwea chaipa en
inanxanaii.
En mekenan pepawen taea jawen piskui paxani jabu
benimaxanikiki”, anikiaki.

Diosunabun ja besti kenwantikiaki, na nawati janchadan

- 100** ¹Dasibi mai anu yudabu jiwebaunabuun,
¡benimakin Jehová Dios kantaxunkanwen!
- ² ¡Shinan chankankin danti itan Jehová Dios kenwankubainkanwen!
Ja bebun bea benima chakayamai kantakubainkanwen.
- ³ Jehovádan, unanti wakanwen. Nukun Dioski.
Jatun nuku dami wani nun jawenabuki.
Nukubudan, nun jawen yudabuki,
janu basi pepa benemis anu jawen chaxuwan mapua keskabudan.
- ⁴ Diosun jiwe beputi anu inun jawen jemaintin kenekauana anu jiki
bekanwen,
ja kenwankin inun pepawakin kantaxunkinan.

Dasibi Diosun matu axunmiswen taexun pepawakin kenwankanwen,
 jawen kena pepawen duawakinan,
 5 Jehová Dios pepa bestiwen taexunan.
 Jawen nui paedan, keyutidumaki, ikibi ikadan.
 Jawen shinan betsa waisma ipakeikiki, keyuismadan.

**Jehován xanen ibujaida wakin jawen kushipa
 inanxanikiaki, na kantati janchadan**

Davidin kanta kenenikiaki.

110 ¹Dios kushipa dasibi binuatun en xanen ibu yuikin:
 “Miki sinataibu en jatu maemadiama manai
 en yusiudi tsayuwe, min tae janakin jatuki kenyantanan.”

- 2 Sión anuxun Jehován jawen xanen ibu unanmati mane mestenti
 min jawen kushipaxanai mia inanxanikiki.
 ¡Bitan miki sinataibu maemakin jatu yunukubainwen!
- 3 Ja xabatian jatube detenamekin min jatu maemaxanun
 minabun mia medabewai mia anu bexankanikiki.
 Min mati medibijaida jatu dami wanidan,
 jabun nibi inun penaya jawenduajaida pexekidanmis keska badi tibi
 pei
 min benaskunkainxanai, bedunansi kushipaidan.
- 4 Jehová mikidi janchai yubakaniwen taeadan,
 Jehóvanan, jawa shinan betsa wama ipakexanikiki,
 eska janchaniwen taeadan:
 “Miadan, minabu ebe janchaxunika niti ikama min ipakexanai,
 Melquisedec ipauni keskaidan.”
- 5 Jehová Diosunan, min yusiudixun mia medabewaikiki.
 Janu sinatajaidakauanaitianan,
 xanen ibujaidabu kupikin jatu yamawaxanikiki.
- 6 Nawa xukua tibibu jatu unanti watan jatun kupiti
 yunubaunxanikiki.
 Jatu jaska watan mawa manibainabu jatu ichawaxanikiki.
 Mai jidabi anu textekia manibainxankanikiki.
- 7 Ja bai namaki unpax jabai akaidan,
 ja unpaxanan, ana jawen kushipa bena inanxanikiki.

Nukun Dios nai anu jiweakiaki, na nawati janchadan

115 ¹Jehová Diosuun, nuku kenwanma
 ibubis min pepakidi mimebi kenwen.

- Min chanimawen inun min nuikipawen taea mimebi
kenkunkainwen.
- 2 Jaskakin ikunwanbuman nuku yukakin:
“¿Janimen, matun Diosdan?” ikaibun
- 3 “¡Nukun Diosdan, nai anuki!”
Nukun Diosunan, jaska bechipaiai keska dasibi dami waniki.
- 4 Jabun Dios ikunwanbumanan, jatun yushin kenwanti dami
wakinan,
jatun mekenen oro inun plata amisbuki.
- 5 Ja damidan, jaxpa jayabia jaska janchatidumaki.
Beduyabia jawa uintidumaki.
- 6 Pabinkiyabia jawa ninkatidumaki.
Dekin jayabia jawa xetetidumaki.
- 7 Meken jayabia jawa metidumaki.
Taeyabia jawa nikauntidumaki.
¡Texu xuiyabia jawa jancha betsa taska kaintidumaki!
- 8 Tsuabunda ja yushin kenwanti dami wamisbudan,
jabisu jatun dami keskabuki.
Ja jabun jatun dami ikunwainbu jabiaskadibuki.
- 9 Israelin enabuun, matunan, ¡Jehová Dioski chiti ikin
ikunwankanwen!
Jatunan, nuku medabewakin nuku mekekubainikiki.
- 10 Diosbe nukunabu janchaxunikabuun, ¡Jehová Dioski chiti ikin
ikunwankanwen!
Jatunan, nuku medabewakin nuku mekekubainikiki.
- 11 Tsuabuda Jehováki man pe janchakatsis ikaidan, ¡jaki chiti ikin
ikunwankanwen!
Jatunan, nuku medabewakin nuku mekekubainikiki.
- 12 Jehová nuku jakimama nuku shinankubainikiki.
Nuku duawakin nuku pepawakubainikiki.
Nun Israelin enabu duawakin nuku pepawakubainikiki.
Jabu Diosbe nuku janchaxunikabu duawakin jatu
pepawakubainikiki.
- 13 Tsuabuda xanen ibu inun xanen ibuma
Dioskidi pe janchamisbu Diosun jabu duawakin pepawakubainikiki.
- 14 ¡Jehován jau matun bababu pawakubainunwen,
matuna inun matun bakebunadan!
- 15 ¡Jehová Diosun nai dami wani inun mai dami wanitunan,

jau matu duawakin pepawakubainunwen!

16 Naidan, Jehová Diosunaki.

Jamen maidan, yudabu yununiki.

17 Tsuabuda ma mawa maiwabudan, janu besti nishmamiski.

Tsuabuda ma mawatan ana Jehová jabun kenwantidubumaki.

18 Jakia nukubu jiweyuxunan,

natian Jehová nun kenwaiin. Januxun jeneama nun

kenwanpakexanaii.

¡Aleluya!

Diosun dasibi unan keyuikiaki, na nawati janchadan

Davidin kanta kenenikiaki.

139

¹ Jehová Diosuun, min ma ea unanti waimaxun min ma ea unanajidaii.

² Dasibi en ikunkainai min ma ea unan keyuiai.

Chaijaidabixun jaska en shinain xunska min tanaii.

³ Janida en nikaunmis inun en janu juindukunmis min unaiin.

¡Dasibi en akai min unan keyumiski!

⁴ Jehováan, en jawada janchai kai ja jancha en taxnimadiama

bebunkidi min ma unaiin.

⁵ En jiwea dasibi en aka tibi min ea kebenbaunaki.

Min ea tsumaxun jawa jeneismaki.

⁶ En jaska jayatidumabiaken min unanepa pejaidawen

min ea “¡Jabaa!” imakubainaii,

nenumajaida en jadi shinankin tapintidumawenan.

⁷ ¿Min Yushin jenebaini en jani katidumen?

¿Min uin keyuaya en jani kai paxai junei katidumen?

⁸ Nai kubudu keyatapajaida anu en inabiakainkenan,

min jabanuki.

Mai kini keyatapajaida medan en jadi butubiakenan,

min jabiadidiki.

⁹ Badi juaikidi beni nuyakaini kasmai

badi jikiakidi ianenwan kesuaudi en jiwebiaken

¹⁰ jabiadia min ea mekekubainxanaii.

Min meken yusiudiwen ea tsumaxun min ea jeneama ixanaii.

¹¹ Ean shinankin meshuten ikai medan en mia juntantidu dabanen

ja xaba chaxapan ea kexebauna betsa wakin meshu wanun ika en

ibiaya

¹² ja meshun ea medabewakin mia anua ea junematidumaki.

Ja meshudan, xaba keskai chaxajaidamiski.

Ja meshu inun xabadan, minadan, jabiaska dabeteski.

- 13 ¿Tsuán ea animen, en yuda dami wakinan? Jabia mian min ea aniki.
En ewan bake nanti medan nanekinan, jabia mian min ea aniki.
- 14 Jaskawen taea e itan en mia kenwaiin,
min ea pejaida waniwen taexunan.
Na yuda en jayadan, min ea pejaida wani chanima en ikunwaiin.
- 15 En yuda yumeidan, jawa mia anua juneama iniki.
En junejaida nanetan ewabiai inun
mai kini keyatapajaida keska medanua en ewakunkainai
min ea uiniki.
- 16 En yuda ewaidan, mianan, min beduwen min uin keyuniki.
Min ea jaska wani dasibikidi min una medan min ekidi keneni
jayaki.
En dama nanei pabuyadiama inun kaintan jati xaba en
jiwepakexanai
ea tanatan bebunkidi min unan keyuniki.
- 17 Jehová Diosuun, min shinan unanepa uke medan tapián bikajaidaki.
Jaska min shinain ichapa tsuan mikidi tanatidumaki.
- 18 En mikidi shinankin tana taewabia mashiti keskaken
jaska waxun en tana keyutidumaki.
Jakia min shinan tana keyukatsidan,
mia putama mibe ikunkainkin en mia jenetidumaki.
- 19 Jehová Diosuun, ¡jabun jatu chakabuwaibu jatu tenanwen!
¡Tsuada eki sinatakauan ea tenantidubu jatu chai nichinwen!
- 20 Tsuabuda mikidi jancha chakabumisbu inun
min kena mia jamen yui yubakamisbudan,
jatu chai nichindiawe.
- 21 Jehová, jabu miki sinatakin mia dananmisbu inun
jabun min jancha ninkama mia dananmisbudan,
¿eanan, en jatu dananmadimen?
- 22 Chanima en juinti jidabiwen jabuki sinatakin en jatu dananmiski.
Jabudan, en jatuki sinatatai jenetidumaki.
- 23 Diosuun, en juinti uke medan ea unanti wakin keyuwe.
En shinan dasibi jaska en pemenkain, ea unanti wakin keyuwe.
- 24 Jadatu baiwen en kai uinkin en bai chakabuwen kai unantan
ea pekidi iyukin min jiwea bai ikibi ikakidi en jawen kanun ea
mekekubainwen.

Jamapai tibiwen Dios kenwantikiaki, na nawati janchadan

- 150** ¹ ¡Aleluya! Dios pepajaidaki.
 ¡Jaki nukuti tadi jiwe medibi anu buxun Dios kenwankanwen!
 ¡Nai jawenduajaida anuxun kenwankanwen!
² ¡Jaska kushipabu dami wani jawen kenwankanwen!
 ¡Jawen pepa jawa keyuisma ikibi ikawen kenwankanwen!
³ ¡Trompeta chan akin mawakin kenwankanwen!
 ¡Arpa dispi ichapaya inun salterio 10 dispiyawen kenwankanwen!
⁴ ¡Shasha abauni nawakauankin kenwankanwen!
 ¡Tepedewe inun mimawati dispiya mawakin kenwankanwen!
⁵ ¡Mane juiya tsakama tsakama akin kenwankanwen!
 ¡Mane juiyawen jawen jui kainmabainbainkin kenwankanwen!
⁶ ¡Dasibi jiwebaunabu nun jawen juinsinaiwenan, Jehová Dios
 kenwanankanwen!
 ¡Aleluya! Dios pepajaidaki.